


MERIONETH-SHIRE.



Montgomerici Comitatus tergo *Merioneth-shire*, Britanice *Sir Verioneth*, Latine *Mervinia*, Giraldo *Terra filiorum Canani*, ad sinum usque lunatum quem dixi, & Oceanum pertingit, quo ab Occasu ita pulsatur, ut non-

nullam ejus partem abripuisse credatur. Ad Meridiem *Dovy* flumine à *Ceretica* per aliquot milliaria dirimitur, ad Septentriones *Caernarvoniam*, & *Denbighiam* attingit. Ipsa vero inter montium conglomerationes omnium totius *Wallia* terrarum (ut inquit Giraldo) *hispida magis & horribilis*. *Habet enim montes altissimos, arctos tamen & in modum acus acutissimos, nec raros quidem, sed creberrimos, & tanta equalitate consertos, ut in summis eorum verticibus pastores confabulantes, vel convitantes, si concurrere forte statuerint, à mane ad vesperum vix convenirent.* Numerosi ovium greges in his montibus errant, nec ullum est à lupis periculum, qui tunc per universam Angliam delati creduntur, cum Eadgarus Rex Ludvallo harum regionum principi tricenos lupos in singulos annos vestigalis nomine imperaret. Quando enim (ut Malmesburiensis habet) *tribus annis hoc prestisset, quarto destitit, nullum se ulterius invenire professus.* Longo tamen post tempore nonnullos superfuisse ex testimoniis omni exceptione majoribus certo constat.

Incolæ qui rei pecuariae omnino sunt attentis, & lacticiis vescuntur, butyro videlicet, caseo, &c. (quamvis Strabo Britannos nostros quasi casei conficiendi ignaros olim irriserit) statura, colore nitido, habitu visendo, & corporis lineamentis vix alteri in Britannia genti concedunt, sed ob præproperam Venerem, & otia male apud vicinos audiunt. Oppida habet rara, ad Ortum qua *Dovy* labitur, *Mouthwy* *Commotus* est notissimus, qui Willielmo alias Wilcock de *Mouthwy*, filio Gruffini *Ap Gwynwyn* Domini Powisæ juniori pro hæreditaria portione obtigit, per ejus autem è filio neptim ad Hugonem *Burgh*, & per ejus itidem neptes ad claras familias de *Newport*, *Leighton*, *Lingein* & *Mitton*.

Qua *Avon* flumen magis ad Occasum defluit, *Dolegethle* est viculus mercatorius à valle in qua conditur, sic dictus. Proxime mare in regiuncula *Arduwy*, *Arlech*, olim *Caer Colum* abruptissima rupe castrum in mare præterdit, quod ab Edwardo Primo (ut ferunt incolæ) extractum, à situ nomen accepit. *Arlech* enim super saxum Britannis denotat. Sunt tamen qui *Harlech* vocant, & *Pulchram rupem* interpretantur. Cum domestico bello Anglia convulsa esset, *David Ap Ienkin Ap Enion* Britannis nobilis, qui à Lancastrensi familia stetit, pertinaciter contra Edwardum Quartum defendit, donec Gulielmus *Herbert*

Penbrochia Comes per medias *Wallia* Alpes difficilimo itinere perrumpens, valido fragore in castra ita detinuerit, ut deditioe receperit. Incredibile fere est, quantas viæ impeditissimæ difficultates ille eluctatus est, cum hic ascendendo repere, illic descendendo se cum suis quasi provolvere cogeretur. Vnde *Le Herbert*, via illa vicinis hodie vocatur. Superius in ipso agrorum confinio æstuarium inrepunt duo celeberrima, *Traith maur*, & *Traith bochan*, id est, *Æstuarium majus & minus*.

Nec procul hinc juxta *Fastineog* viculum via publica, sive militaris, quæ saxis constrata per montes hos præpeditos, & quodammodo invios ducit. Quam cum Britanni *Sarn Helen*, id est, *Helenæ strata*, nominant, *Helenam* Constantini matrem, cujus multa, & egregia erant per Romanum imperium opera, constravisse par est ut existimemus. Nec procul abest *Caer-Gai*, id est, *Castrum Gaji*, à *Cajo* Romano aliquo extractum, de quo magna & mira vulgus vicinum prædicat.

In Orientali agri parte *Deva* flumen è duobus fontibus exortum (unde nomen gestare credunt, *Dwy* enim illi vocant, quo nomine & binarium numerum denotant, licet alii à divinitate, alii à nigro colore dictum contendant) & statim *Lbin-tegid*, Anglis *Pimble-meare*, & *Plenlin-meare* lacum longe lateque diffusum integer transmeat, & exit tantus, quantus venit. Nec enim *Guiniad* peculiare lacu pisces in *Deva* videas, nec *Salmones* in lacu, qui tamen in flumine passim capiuntur. Sed vide, si placet, lacum *Poëtæ* Antiquarii versibus accurate depictum,

*Hispida qua tellus Mervinia respicit Eurum,
Est locus antiquo Penlinum nomine dictus,
Hic lacus illimeis in valle Tegeius alta
Late expandit aquas, & vastum conficit orbem.
Excipiens gremio latices, qui fonte perenni
Vicinis recidunt de montibus, atque sonoris
Illecebris captas demulcent suaviter aures:
Illud habet certe lacus admirabile dictu,
Quantumvis magna pluvia non æstuat: atqui
Aere turbato, si ventus murmura tollat,
Excrescit subito r'apidis violentior undis,
Et tumido superat contemptas flumine ripas.*

Hujus supercilio insidet *Bala* oppidulum immunitatibus dotatum, sed raris incolis, ædificiisque incultissimis, nihilominus præcipuum forum montanorum.

Hugo Comes *Cestrensis* primus Normannorum hanc regionem dispositis præsidii occupavit, cum *Gruffinum* filium *Conani* captivum teneret, sed postea ille hanc cum reliquo principatu recuperavit, posterisque reliquit, donec fatali periodo confecta, in *Leolino* desit.

Montes
admodum
editi.

Lupi in
Anglia
extincti.
Vide Der-
by-shire
pag. 303.
& York-
shire.

Mouth-
wy.

Dolege-
thle.

Herberti
via.

Fastineog.

Via He-
lenæ.

Deva
fontes.

Pimble-
meare.

Guiniad
pisces.

Bala.